

本朝分省人物考

人物考卷之七目錄

北直隸真定府

趙耀

崔亮

李遵義

張益

李琦

杜時

黃懋

邢端

扈暹

趙向

侯保

曹鵬

馬謹

張鳳

馬恭

畢鸞

白圭

毛玉

張春

王詔

楊傑

白鉞

張子麟

張舉

石玠

石瑤

王宸

郭濬

呂鏜

孔環

張璿

呂秉彝

劉俊

賈應春

王誥

楊宜

毛鵬

王命

宋登春

補遺

寇義

張宏

蔡鶚

本朝京省人物考卷之七

北直隸真定府

趙 燿

趙燿寧晉人洪武初以湖廣行省掾進中書省左司
提控大將軍徐達取蘇州還授大都督府都事及達
平山東河南克元都取山西入關中燿在幕府綜理
愼密不憚勤勞達愛重之至于遣將四出攻戰守備
機宜方略燿皆預焉比還擢湖廣行省叅政陞辭
上以燿從達取元都知其風土民情邊事緩急改授
北平行省叅政且使守護王府宮室及行 詔入諭

之曰聞北人多來歸附者汝宜速往選其驍勇可用者爲兵月給米贍之餘處之臨清東昌之地毋令失所燿因進工部尚書張允所取北平宮室圖進上覽之令依元舊皇城以改造王府燿受命辭行未幾卒于官

崔亮

崔亮藁城人洪武元年授中書禮曹主事遷濟南知府丁母憂起復爲禮部尚書癸未詔定官員親屬冠服之禮亮於內外官員及隸卒軍士等制各定有差三年上諭亮曰司天臺言朔日以來日中有黑子

占者多以爲祭天不順禮所致令亮制之亮引漢唐
宋及元損益不同復以我國家前議圓丘從祀之
禮以漢唐爲煩故止祀日月星辰太歲爲簡當上
然之而止復問郊祀天地拜位皆正中而百官朝叅
則列東西避正中何也亮對以天子祭天升自午陛
祭社升自子陛蓋社主陰陰北方也故君南向答陰
之義也郊主陽陽南方也故君北向以答陽也若羣
臣朝叅無相答之義俱當避君上之尊故升降則皆
由卯陛朝班則分列東西以避馳道此其義不同
上重亮議因命百司朝叅左右班不得越省府臺俱

就拜甬道上復承命議百官及內史監官於皇太子親王前稱謂又定大朝會常朝及內外官員辭謝奏事侍班等禮付侍儀司行之并定皇太子以下及羣臣賜坐殿上坐墩墩制叅酌宋典各爲等差又請旗纛止祭于當祭之月與夫宗廟四時之祭皆用四時孟月及歲除凡五祭於清明等節各備時物薦享俱允行之時禮儀草創而亮引証考據多本經典云

李遵義

李遵義衡水人性嗜學博洽經史洪武庚午鄉薦登丁丑進士授河南新鄭縣令政識大體務合民情尚

廉介抑苞苴吏尤畏之或政暇常巡視閭里以稽民
瘼有富民者賄里書妄訴爲貧遵義歷述其富狀以
詰其僞乃自驚服至斷訟不勞多語甫聞兩造辭卽
判曰某也詐某也實一言而決人咸服其明允永樂
二年擢浙江紹興府同知尋改除按察司僉事歷大
理寺左寺正陞河南府知府至今立祠祀之

張益

張益安平人洪武丙子膺鄉薦入太學以才能拜郢
王府典儀成祖入承大統益以才行卓越陞刑科
給事中益侃侃敢言惟務伸冤理枉時有郭禮因視

田毆死盜禾軍人事覺有司以殺死軍人律抵罪益
曰律有明條罪人拒捕主者格殺之勿論今郭禮田
主也盜禾者罪人也以田主毆死罪人法當免坐若
抵死於律有乖具以事聞 上特宥之未幾轉禮科
右給事中 上臨朝羣臣奏對多失序益代陳奏事
明辦稱 旨特呼爲響張以示寵渥後刑部都察院
凡有所逮罪囚皆令禮科官引奏益自益始永樂已
丑扈駕幸北京會胡虜數爲邊患 上命監軍深入
虜營主將失利益被執虜持刃脇益不屈曰生爲大
明臣死爲大明鬼非死無以報國虜憐其忠烈竟棄

之時仲秋天寒兼雨雪跣足南行數百步墮然而終

李琦

李琦元氏人洪武末年以文學授滄州訓導坐事謫戍雲南革除中以經明行脩授監察御史尋遷大理寺副復謫雲南永樂初上書陳情召試御史會安南侵廣西地命琦往琦援引趙佗呂嘉逆順禍福之理凜然可懼安南感悟遂罷兵歸侵地比還實授監察御史宣德元年陞行在禮部侍郎後占城與安南交惡復命琦往諭之兩國遂和自是西洋諸番有事悉令往焉所至無不款服後陞湖廣布政使甚得士民

心陞行在都察院都御史掌院事尋卒于官

杜時

杜時深州人永樂十五年舉鄉試第一十九年登進士授山東道監察御史督學政校文崇雅黜浮士子頌服宣德七年特下求賢詔在廷重臣以時爲首時公忠方正操行益堅平居不妄發一語及論天下得失生民利病社稷大計則疊疊便便面諍庭辯不稍囁嚅必欲直以理而後已及巡兩浙強衆不敢凌暴寡弱至今口誦不衰後陞順天府尹卒于官

黃懋

黃懋元氏人永樂甲午鄉舉乙未進士擢戶部主事
有能名尚書夏元吉甚敬重之累官嘉興知府公廉
剛正子惠困窮力除宿弊盜息賦均民戴之如父母
尤篤意學政孜孜好賢樂善有古循良風後遷福建
左布政使歷五年致仕卒于家

邢端

邢端井陘人永樂庚子中鄉試授監察御史尋陞湖
廣襄陽兵備副使端素性剛直蒞政守法不阿權勢
時僭苗爲梗作亂端奉勅征之勦其寨三十餘所
及回賜金幣褒嘉之秩滿屬民詣闕保留復任三年

卒于官

扈 遲

扈遲元氏人永樂甲午鄉舉歷任戶部郎中擢鳳翔知府政務寬簡識大體作興學校時以內艱去任部民詣闕保留及秩滿復保之遂增俸仍管府事三十餘年乞致仕月給俸米三石以終其身

趙 向

趙向無極人永樂中由歲貢入仕性剛介寡合尤恬於勢利不趨權貴遇難處事識見風生歷任俱有能聲士民戴服官至湖廣右叅政鄉人祠之

侯保

侯保贊皇人賦性剛正少有大志及就貢知許州襄城縣坐南陽指揮雍善人命事落職襄民李仲等數百人赴闕極陳清廉愛民狀恩宥還職尋以取勘錢糧謫瀋陽戍未及役刑科給事胡信以清廉撫民才堪太用力舉之復除知海州慙榆縣時丁外艱欲歸顛民劉釗等復以廉靜撫字民得安業奏留及守制起復補知山東博興縣尋陞交州知州三載例考滿仍令在職後以課最陞交趾布政司右叅政時交趾復叛賊勢猖獗保專以討除爲任奮不顧身前後三

十七戰生擒賊首斬首若干級保復率民兵築堡寨禦之後賊復來攻保寡不能勝遂遇害人皆惜之

曹 鼎

曹鼎字德恒寧晉縣人。幼有遐志。日誦數千言。居常篤行事。繼母備極孝養。永樂癸卯舉鄉薦。宣德丁未中乙榜。授代州學官。疏辭不受銓。曹銜之。改任泰和典史。時中使旁午。郵無虛日。鼎處之裕如。暇卽延禮師儒。講明理性。宣德壬子督工匠赴闕。疏乞入試中第二人。楊文貞一見奇之。明年廷試。宣帝策以義禹河洛象數。萬對稱旨。上親擢第一。賜宴於禮

部永爲定例授翰林院修撰從楊文定公遊所得益
深正統改元 英廟初御經筵掄選講讀官鴈首預
焉敷納明暢聞者聳敬三年預修 宣廟實錄轉侍
講五年 命入文淵閣辦事甲子進學士乙丑廷試
讀卷得商輅爲第一是歲陟吏部左侍郎仍兼學士
入閣鴈學瞻行端內剛外和識達政體才智出人爲
英廟所眷注國朝制母止封兩人正統十二年鴈陳
情乞將前母孟氏一體追贈詔允之不爲後例蓋特
恩也十四年己巳五月戊申鴈奏侍讀劉鉉修撰王
振堪教習庶吉士修撰許彬郎中潘勤堪督四夷館

從之七月虜酋也先大舉入寇中官王振力請親征

上命武官英國公張輔等文官兵部尚書鄺埜等及鶴與侍讀學士張益扈從巡邊是月壬寅車駕次雞鳴山癸卯次萬全峪是夕金星犯亢甲辰次懷安是夕黑風四塞丙午次陽和是夕火星犯土王振蔚州人邀上幸其第癸丑次白登王振益恣肆驕橫迫挾進兵成國公朱勇膝行聽命戶部尚書王佐竟日跪伏草中噤無一語惟欽天監正彭德清首斥振曰象緯示警不可復前若有疎虞陷乘輿于草莽誰執其咎鶴繼之曰臣子固不足惜主上繫宗社安

危豈可輕進振怒詈之曰倘有此亦天命也八月辛酉次土木命太監吳亮相地布營陣未定虜已據南河次日虜僞退王振復矯制起營迫之虜大蹂躪我師敗績死者十餘萬人虜及諸臣五十二員死之景帝聞之贈虜少傅謚文襄遣官諭祭官其子恩爲大理評事英宗復辟加贈太傅改謚文忠又官其孫爲錦衣衛百戶

馬 謹

馬謹字守禮新樂縣人宣德丁未進士癸丑拜貴州道監察御史正色立朝慨然以功業自期嘗巡按浙

江等處所至克振風裁貪猾屏迹時楊文貞輔政不輕許可重其廉介特贈之詩至以冰霜鐵石比之時以爲確論正德壬戌改吏部驗封郎中秉公不阿勢要凡用人悉遵常格無敢越者雖臨勢力炎涼終不改其操節乙丑陞湖廣右布政使至官敦德化剷宿弊吏民悅服時所屬多淹獄久弗決御史閻寬以謹精於法律奏同審錄平反甚衆歲己巳邊郡隆里等處苗賊生發攻圍城寨殺擄官軍 朝廷以謹歷練多謀特勅同叅將張善御史侯爵往總軍事兼督糧餉至沅浪衆議分兵勦殺之謹曰苗之叛逆非苗罪

也有司橫征暴斂以至斯耳盡殺之徒傷國家好生之德盍先傳檄申諭降者安輯使得其所彼負固弗庭然後分兵討之未晚也衆皆稱善及期諭之來降者數千悉分布郡縣給糧賑之冥頑不服者督兵繇沅州綏寧等處四出截殺攻破淇溪等寨斬首百餘奪回被擄男婦三百有奇頭畜千餘景泰庚午復與張善等攻破洞賊千餘馘斬至四百有奇奪回被擄男婦頭畜倍之捷聞賞賚獨厚已而青龍渡馬楊山等處賊猖獗檄謹同叅將李震等由塘口進奪浪江破賊擒斬餘賊奔潰甫回靖州而石壁等寨賊復乘

隙出掠遂督衆奮擊擒斬千餘旣而東山賊寇復出
仍督官兵追殺擒獲捷聞獎賚尤厚歲辛未春武岡
城溪平水等處賊通廣西蠻寇團聚青肺山陸梁滋
蔓謹謂震曰今用兵累勝勢同破竹苟玩愒歲月則
刀鈍節堅雖進不可得也於是督兵攻破賊寨死者
無算而扶城等寨聞風悉降乃奏凱班師當時會議
平苗之功與震等同冒鋒鏑而其運謀制勝糧餉不
絕則謹之力居多朝廷賜誥進階正奉大夫正治卿
景泰元年陞左布政使其後朝廷論平賊功又陞正
二品俸歲乙亥被召至陞都察院左副都御史奉

勅巡撫河南明年奉勅奏覈所屬官吏凡貪墨無狀者悉黜罷之允愜公論天順改元援例進階資善大夫遽以老致仕居家十有餘年惟課子孫耕讀而已未嘗輕出門戶享年七十有七

張鳳

張鳳字子儀安平縣人父益故爲禮科給事中初母有娠一夕夢大星出懷中覺而生鳳人以爲異隣有病者召巫治之鳳往觀之竟不驗扣其神曰卿相在此及去神乃降隣衆驚異曰此子殆不凡者稍長授春秋每有講說卽能問難頴悟異常已而母病躬侍

湯藥衣不解帶母卒居喪盡哀人服其孝永樂乙丑
北虜犯邊文廟親征父益以給事中贊理戎務因主
將失利沒於軍鳳年十四大父母垂白在堂家道蕭
然鳳哀毀踰禮與兄奉祖還家竭力侍養甚得歡心
久之有司聞其孝友選爲邑庠生鳳奮力於學雖祁
寒暑雨不輟遂領薦入大學時鴻臚序班缺員例選
北人爲之吏部尚書蹇義見而異之曰是生不可就
此職也宣德丁未登進士第癸丑春擢刑部江西司
主事時江西豪民爲逆者千餘人繫獄未決一訊皆
得其情獄上獲生者數百人能譽大振大司寇嘉其

才特令總闔部章奏及錄在京逮獄者正統戊午冬
陞授本部右侍郎由主事而進侍郎者前未有也已
未夏以京城草廠出納多弊勅巡督之辛酉奉改南
京戶部右侍郎鳳上疏曰南京根本重地糧不可不
素蓄宜每歲分米二百萬石遂定爲令往年南京芻
粟專委之憲臣至是勅兼督蓋以出納嚴慎故也時
人以其執法呼爲張板朝廷亦知其名已巳春賜
聖書嘉勞有清勤公慎之褒賚以白金文綺景泰壬
申奏陞本部左侍郎未幾進本部尚書明年廷議轉
南京兵部叅贊守備機務又明年召爲戶部尚書時

邊務方殷錢穀之費動以萬計多以不給爲憂鳳處
之裕然國用不勞而足天順改元仍命爲南京戶部
尚書兼督儲辛巳春以考績赴闕上慰勞有嘉以
足疾懇辭休致不允舟還疾甚未抵任而卒享年六
十六鳳爲人正直而心地平易遇事敢爲人不敢以
私干之尤篤於友義故人李恂爲太常贊禮郎母老
子幼夫婦相繼而卒鳳惻然遂養其母以終聘其女
爲子婦教養其子至於成立又急於濟人嘗渡江偶
遇一舟覆於急流卽捐白金購人救之舟中之人賴
以全活性尤真率客至卽出酒殽對酌爲樂不計豐

約與之接者未嘗不稱爲朴實君子云

馬恭

馬恭唐縣人由監生授杭州府推官正統二年除陝西道監察御史八年奉命往陝西巡邊尋又奉命協贊延綏等處軍務九載任滿陞都察院右僉都御史仍理前事景泰二年以殺賊功陞右副都御史恭在邊十餘年軍政修明下人悅服四年以老疾致仕卒遣官諭祭

畢鸞

畢鸞井陘人父貴莒州學正以疾卒于官鸞時年少

窮不能歸喪遂藁葬于莒獨奉母暨幼弟歸井陘家
業荒落鸞朝則經營力食夜則讀書尤以父骨未葬
爲恨與人言輒涕淚交下不止正統元年母卒鸞哭
踊幾絕水漿不入口者四日乃諭弟曰母歿無事于
養我其歸父骨以葬遂衰經銜哀徒步負父骨歸躬
營合塋葬邑之西山旣事乃廬墓側朝夕哀哭之有
野鹿當哭痛時亦爲之悲若助其哀者又有兔領其
雛遊於廬之前後動息如家畜者忽巨蛇蟠門上不
驚不愕若有所守衆始爲異後如其初歎曰是乃孝
感所致鸞曰適然耳有司具其事以聞 詔旌表其

門後舉正統壬戌進士授福建道監察御史歷山西湖廣叅議蒞官嚴明有清操學士劉文介傳其事稱爲孝廉云

白圭

白圭字宗玉先河南磁州人祖進忠仕元爲千戶徙真定之南宮後遂爲南宮人自幼天資英偉識度過人登正統壬戌進士除監察御史先是南宮士未有中科者有之自圭始進士未有卽授御史者有之亦自圭始圭持憲秉律恒存大體嘗奉命監出塞捕虜軍及巡山西已巳之變廷議簡朝臣有文武才幹

者俾守要害圭得澤州募士練兵悉可就用會虜退
召還陞陝西按察副使司多滯獄比至鞠得其情悉
斷遣之民掠官糧爲食者有司置之法惻然曰民饑
至此不幸也若拘於法死者衆矣乃杖而釋之景泰
中陞浙江布政使浙自葉宗流亂後民多凋瘵餘賊
有伏草莽者圭宣明德意捕誅逋孽因歲大饑奏蠲
其租賦發廩勸貸而賑濟之數辨疑獄申理冤滯民
安堵焉天順改元湖廣貴州苗賊弗靖陞都察院右
副都御史巡撫其地時賊據險我兵不能討乃多爲
疑兵分道進攻賊遂不能支遁去擒其渠首斬之餘

黨悉平在湖三年興利除害善政尤多常有勅督
造戰艦甚急衆議欲賦材於民主持不可請於藩府
得以抽分木代造民德之三年虜衆寇關內召爲兵
部右侍郎往賛戎務入對便殿賜賚優渥卽日就道
至陝適總戎失利虜勢甚熾乃按兵不戰至固原值
虜奄至從騎僅百人令悉下馬結陣以待虜疑有伏
兵乃引去躡之獲十餘騎及牛羊以歸旣而花馬池
海納都入侵連戰皆捷虜因解去還朝董慈壽皇
太后葬事於景陵有銀幣羊酒之賜七年工部尚
書員缺帝意屬圭執政者欲舉所知託以俸淺爲

言 帝曰卿所舉乃方岳爾白圭由方岳歷都憲至此不可授乎卒授之 憲宗卽位幸大學耕籍田開經筵皆預侍 裕陵營造承天門修建董役俱有犒賜荆襄賊嘯聚攻切州縣 上命撫寧伯朱永總兵主提督軍務往討之至南陽分兵爲五路圭與撫寧由南漳入遇賊誘之臨城擊破之乘勝進兵賊退入窠穴犯險冒雨恒先士卒而登賊憑高爲拒時諸路兵會已二日攻之不能下圭命裨將率卒千餘由間道出賊後焚其營而自以大軍臨之賊衆迎敵顧其營火起遂驚駭蹂亂走斬首數萬級生擒首賊獻俘

京師會父喪乞守制不允還京論功加太子少保陞
從一品俸兼兵部尚書提督十二營操練復辭職乞
終制俱不允賜玉帶寶刀織金麒麟以寵異之四年
彗見求直言具請分遣大臣巡視民瘼黜貪酷旌賢
良以和民情庶天變可弭從之陝西土達蒲四反總
兵官伏羌伯戰沒餘將俱北關中震動主違衆議特
舉都督劉玉可用卒以成功十一年以晝夜勞勩成
疾上數遣中貴及御醫視之以滿三考進階資德
大夫正治上卿丁母喪詔葬畢復任辭不允還家
治事數月疾復作竟卒年五十六贈少傅謚恭敏仍

官其子錦衣百戶圭在任有識見處邊務動中機宜每以師出糜費害及地方感傷天和不輕議兵事平生孝友勤敬業師沈彥昌沒殯於南宮歲時展謁不忘遇同僚及所知喪事猝不能辦者輒爲棺具在荆湖常泛舟江中值暮風大作舟人震恐神色不動甫登岸舟溺焉在貴州時人有憤中貴嚴酷欲刺之者悞入圭所擁衾問之刺者驚曰我公也卽自刎未死仆於地圭略無怒意善遣之其度量優弘類此

毛玉

毛玉字良器真定元氏人祖伯時號蘭竹先生生而

失明能誦易精潛虛學預談人貴賤壽夭貧富吉凶
無不應者被遇 太宗嘗以袁天罡稱之寵眷優渥
久之以老乞骸骨詔以中貴護送還鄉以卒時玉已
生蘭竹撫之曰振吾宗者其此兒邪應正統辛酉鄉
薦人太學時祭酒古廉李先生典教事特獎拔之一
時英士多從之遊戊辰登進士第官南部已巳擢兵
科給事中改吏科凡叅駁彈糾務存大體略虛文言
罷諸不便事數十如停起復禁請謁革濫舉停鬻官
免征逋負寬稅凶荒留養太學生徒皆國體政本之
大者又疏求賢講武之要凡數千言皆見嘉納然體

素羸遇盛寒暑輒病病稍間輒出出不數日而章奏
屢上及疾亟猶陳六事事未下而玉已逝矣壽止四
十有二玉資性明敏器度灑然人皆愛敬之交游半
朝野事母最孝撫教弱弟尤篤友愛爲文清婉有致
尤長聲詩其在吏科一時章奏皆出其手不但文辭
工緻而人情政體曲盡其款惜未竟其用也

張春

張春真定人長於詩賦正統乙丑登進士初試南宮
主司欲首薦以北卷爲疑旣拆封知爲真定人以問
宰相曹公曹與張同邑銜張不往見但謝不知遂寘

第六廷對復得第一甲第三人曹又易置第二甲第五初授南京廣東道監察御史 國朝進士釋褐爲御史自春始時中官王振用事齊韶附之得南京刑部尚書倚托縱恣人莫敢言有指揮某者與徽商友善往來無間結爲昆弟指揮富而無子有三女指揮卒徽商遂謀襲其官媚指揮之妻其妻信之遂許爲嗣旣得官併欲奪其產沉指揮之妻於江旣而事漸彰聞指揮女在儀真者訟之刑曹齊韶受賂竟右商人而誅指揮女徘徊都市商殺之血汚女衣以石沉之井又連殺指揮一奴一婢都下無論貴賤皆痛憤

然畏韶七年無敢問春初至官見婦人泣而呼冤蓋
指揮女在鎮江者也都御史過之若不聞御史過之
亦若不聞張心疑之問之同官同官搖手諭之曰此
非君所當問也春奮然曰朝廷設耳目之官何事不
可問有事不問號稱御史不亦辱乎今日吾固當問
之同官掩口笑曰南京京城事皆屬廣東道春遂按
之白中丞中丞怒曰汝書生不諳時務躁妄如是汝
登第幾時蒞官幾日遽欲預事乎韶聞之大怒曰吾
不識張春何狀豈喪心病狂乞死者耶不然何以反
吾獄旣而窮按不已事大暴著井中血衣尚在獄詞

皆張手筆韶見之大驚曰彼書生何精練至此始有
懼色因求都御史勸阻之都御史曰吾前叱之今日
何面復與之言乃令同官言之春遂列齊韶見阻之
意都御史轉託之言并同官三四人連獄詞具疏呈
都御史求印都御史固不肯印月餘都御史去御史
曹姓者署印強使印之乃得聞上而齊韶之疏先
上矣時北京都察院都御史寇莊愍公見之曰此疏
何得先上都察院本亦當卽至宜徐待之三日張疏
果至下錦衣衛提問韶與春連逮至京錦衣衛金指
揮者亦無子問其事淒然泣下故齊韶無所措詞時

春疏言韶放縱數事其一史氏事史氏初與后妃之選英廟欲立爲后而疑其姓謂朱與史婚非雅遂賞表裏還之齊韶竟納爲側室春又上書王振幾千餘言首論此事王振讀至此驚曰他事吾尚可爲此事吾豈能左右乎由是商始伏辜以殺死一家三人論而齊戍邊刑部原問官死於獄御史轉託者俱爲編氓惟春復官於是韶上疏申辯上怒勅再辯者斬韶怨王振不右已以爲是獄皆振所爲也上疏言振罪上怒竟論棄市時春一疏殺一尚書杖殺刑官數人罷三四御史直聲振動天下時韶雖死

而總兵官石彪猶恃勢暴酷貪剝無厭春不勝慨上
疏力劾其惡尋被構謫後彪敗人皆誦其直歷山西
僉事轉應天府治中致仕其贈友人詩有人心恒隱
竭天道不張弓之句至今人傳誦之

王 詔

王詔字文振趙州人天順八年進士授工科給事中
論事務持大體 睿皇后崩值秋享 太廟時議謂
不當以卑廢尊詔言禮有喪不祭則移日請俟釋服
行之雖不果行然議禮者不能屈遷都給事中與同
列會秦起致仕尚書王竑李秉而 御史王越或

有譖之者 憲宗召至便殿賜杖且詰責之衆莫敢
對詔仰而呼曰臣等言雖不當實區區犬馬之誠非
有他也聞者壯之陞湖廣右叅政以父憂去服除再
任遷右布政使弘治初進貴州左布政使獨携二僕
之任未幾擢右副都御史巡撫雲南飭守禦嚴斥堠
復以孟密亂招集有功再荷褒諭巳酉奉詔錄囚躬
冒危險觸炎瘴平反甚衆尚書吳雲洪武中繼侍制
王禕死事雲南後禕賜謚文忠令雲南歲祀而不及
雲詔言于朝賜雲謚忠節與禕並祭四年赴任南京
病卒年六十四時詔官三品未及考 上特賜葬祭

詔儀觀魁岸坦衷夷節自處不苟歷官顯要清約如
寒生卒時無子弟在側官屬爲治後事囊無長物世
稱其諒直而惜其勿究于用云

楊傑

楊傑廷俊其字也別號立齋世爲平定州人傑聰悟
異常比成童卽爲邑諸生每試必冠成化戊子鄉試
中式明年會試下第歸郡西有冠山佛廬靜深讀書
其中以餘暇爲詩歌追古作者士多從之遊蔬食菜
羹淡如也郡守素知傑意欲傑往而後修好或有從
他郡招之者皆堅不肯往其自守如此戊戌禮部試

廷試俱高等爲庶吉士時學益進造詣益深庚子授翰林編修聲望日重甲辰會試爲同考官稱得士戊申孝宗卽位充經筵官有文綺白金之賜己酉滿九載陞侍講尋充講官啓沃得體辛亥同修憲宗實錄成有銀幣襲衣之賜遂陞司經局洗馬壬子爲應天府試官是科最稱得士甲寅充日講官復充東宮講讀官與修大明會典未終事而疾作竟不起享年五十有六事聞賜祭一壇蓋特恩云

白鉞

白鉞字秉德南宮縣人父圭歷官兵部尚書鉞舉成

化庚子京闈第一甲辰舉禮部廷試第二人授翰林
院編修弘治戊申同修憲廟實錄以內艱去癸丑
同考禮部丙辰秩滿遷侍讀己未充經筵講官壬戌
復同考禮部癸亥修大明會典成進侍講學士賜宴
禮部尋命與修歷代通鑑纂要甲子考南畿鄉試乙
丑武宗登極進學士加從四品俸充日講官賜紗帽
鞞鞞諸物丙寅開經筵賜白金綵幣丁卯命教庶吉
士署掌院事擢禮部右侍郎賜御製蟠龍諸物并纂
要本年改吏部三年轉左尋陞禮部尚書己巳賜玉
帶庚午復命兼學士入內閣專典誥勅掌詹事府事

以寧夏平賜資金牌加太子少保居月餘以疾卒年五十贈太子太保謚文裕鉞以公卿子習聞朝廷典故加之問學博涉強記詞翰清美見稱於時而久職文字專典禮樂爲朝望所推所著有怡情稿若干卷

張子麟

張子麟字元端其先代州人永樂中以閭右徙實真定遂占籍藁城麟生而穎敏異常十九舉於鄉登成化甲辰進士授南京大理寺評事陞寺副寺正凡居理寺十年擢守汝寧歷山西叅政河南布政使都察院右副都御史巡撫湖廣入爲刑部侍郎晉尚書加

太子太保麟歷事 四聖更踐中外四十餘年其在
理寺剛直精慎刑讞駁正無所依避以平允稱汝寧
之政訟平賦均膏濡弘洽報政則拜燕服之賜解任
則遺銘頌之思時以爲天下循良首山右澤潞等郡
歲饑志切焚溺濟以便宜亟於傾廩緩於稽券所活
民以數萬計厥後撫荆南值凶歲復以山右之法賑
之所活民四十餘萬急邊圉謹儲備戒戎律飭官常
撫居勦叛舉良刺頑罔不秩然各究其實爲方伯河
南鎮守巨璫恣橫不法執其黨屬罪之而地方以寧
及爲刑部屢更諸大獄若逆藩宸濠及逆瑾寧彬輩

相繼不軌優然決斷悉抵於法論者謂非守有定植才無卻流不能及也嘉靖初特加眷遇屢荷白金彩幣寶鈔羊酒玉帶蟒服之賜至於賜給人口及歸省給鈔爲路費咸爲殊典麟貴時父母皆生膺一品之封朝廷命有司具牲米存問恩榮特異麟以親老乞休溫旨勉留最後得請歸養天語諄切促其復來而麟浩然雅志優游林下者二十餘年享年八十有八以終訃聞賜諭祭者九遣官營葬可謂福履備至也已

張舉

張舉藁城人世以農爲業至舉始讀書卽刻志鑽研
聞京師多名公碩儒乃裹糧負書徒步至都下復從
京口楊舍人一清聞道德性命之說侍立終日未嘗
倦倚諸儒咸異之客邸甚窶日提一油罌詣館宿乘
間請問辨難古今舍人惕然曰士未有如此篤信者
也成化丁未擢進士授戶部主事初監京城明智坊
草場及巡象馬牛等房卽剔抉姦蠹悉論如法賄賂
不得行時倉場多儲中璫督收半歸囊橐多供張設
樂以娛部官遂掣肘結舌舉獨不受自携菜果裁度
饑渴雖所乘馬亦清鞚終日不與少秣歲以爲常內

外憚之無敢犯法者後監宣武諸稅日往稽閱出其
不意諸課始入公家門官患之請於大司徒大司徒
教下執不從乃泣訴於司禮曰主事爲誰對曰張舉
司禮曰是弔馬張乎汝慎避之復督天津運軍採秋
青草舉身督率復廉知運官姦弊廢冒廩及督運
總兵故縱不問諸事上疏論列請寘於法不報然上
下皆稱其鯁直會岳州知府缺劉東山大夏力求得
爲守舉到郡考能激汚首罷民所不便十餘事郡前
湖水多魚故事守以下有之至是未嘗舉網歲辦鮓
貢裁取足用有餘悉付漁戶爲課家貧親且老俸悉

以供養妻子未嘗衣紈綺食重肉天資挺直不依違
詭隨數與監司因事爭曲直詞色凌軋上官積不能
平亦屢詘抑之輒憤歎曰張舉亦男子也何至爲富
貴下人哉卽遺書欲求去會御史復出行部有所意
望箠撻主簿一人譴死舉仰天曰以吾忤物之故乃
不能庇其屬哉方草劾欲上求直其事不勝憤按筆
而卒其篋惟俸錢數兩及衣衾而已東山過其里親
謁祠下涕泗交下益慟其志不獲大用云

石玠

石玠藁城人父王歷官按察使性耿介端方尤嚴義

方之訓故玠與弟瑄奉教惟勤同登成化丁未進士
瑄改庶吉士玠授汜水知縣有惠政召爲河南道監
察御史嘗奉勅覈大同邊儲按甘肅復按陝西邊務
興革悉中機宜監臨鄉試時號得人乙丑推綜三法
司事左都御史戴珊素知玠事無巨細悉委之正德
丙寅陞山西按察司副使督學政教人以修德行務
經學爲本歷本司按察使陞右布政使尋轉左至是
去父王按察公舊治僅二十年而吏民安其政如按
察公時人以爲世美常作瞻栢堂以志感辛未陞都
察院右副都御史巡撫大同玠久歷邊陲習諳戎務

凡將領而下量才任使皆得其宜間有違法者裁以大體不爲深文小苛故人爭盡力邊境用寧未幾入爲兵部右侍郎遼東諸夷不靖命以左侍郎兼右僉都御史往諭之玠宣布威德相率歸服乙亥陞戶部尚書留心國計酌盈濟虛時武宗北巡日有調集軍費不貲玠經營籌畫未嘗告匱會錢寧竊權阻壞鹽法累執奏與之忤被讒奪俸因疏乞骸賜勅乘傳還鄉歸杜門却掃意緒澹然喜讀國語左傳尤好淵明樂天詩所著有東潭漫稿藏于家

石 瑤

石瑄字邦產，豪城縣人。父玉，由進士歷官山西按察使。瑄自幼穎異，莊重弱冠，爲諸生，卽與兄尚書公玠俱有文學名。謁楊文襄公，以文爲贊，文襄甚奇之。舉成化丙午鄉試，丁未同兄玠登進士，被簡爲庶吉士。弘治己酉，授翰林院檢討，德器剛毅，知識不羣。館閣重之，與修大明會典，同考禮部會試。少師李文正每曰：「諸後進可托以柄斯文者，其石氏季方乎？」辛酉充經筵展書官。乙丑，遷修撰，同修孝廟實錄。正德丙寅，武宗初開經筵，充講官，賜宴及銀幣，因士風漸漓，多巧宦，作媒說以諷，尋遷南京翰林侍讀學士。已

已擢南京國子監祭酒教法嚴邃濟之以恕時闔瑾
用事士大夫多附會之以苛刻博勵精名南京禮部
因監生查對軍冊有患病者不容給假瑄力主之南
京戶科因晒晾黃冊有不至者輒行典簿廳取供瑄
以祖宗成憲不敢擅改答之諸生感悅庚午改北
監八年瑄言正統景泰間西北用兵糧儲乏少廩餼
不繼暫令減歷今則坐班人寡不敷差撥宜照先年
事例照舊歷滿方與起送撥補仍申飭復班限期不
使冒送上從之九年陞南京吏部右侍郎簡靜持
正乙亥改禮部丙子轉左丁丑命兼翰林學士掌院

事教習庶吉士庚辰主考會試辛巳擢禮部尚書仍兼學士掌詹事府事尋陞吏部尚書是時輔臣有不悅者託辭請命仍兼學士在內閣專管誥勅實奪之權也修武宗實錄爲副總裁官壬午遣祀闕里及東嶽少昊陵旣還復主癸未會試事甲申奉手勅兼文淵閣大學士入典機務乙酉武宗實錄成賜宴禮部加太子太保賜白金鞍馬尋賜玉帶蟒衣丙戌上御平臺召內閣四臣面諭各賜詩一章於珣稱許尤至進恭睿獻皇帝實錄加少保宴賜如前以災異自劾祈免不允丁亥錦衣官有構飛語訐

輔臣者併中傷之遂逮下廷鞫臺諫皆白瑤無他大學士楊一清爲瑤等力辯之瑤不自白惟求去疏再上許之旣入謝僦民車歸私第閉門不出邑人罕識其面人望益歸重之瑤在國子時以身率人教嚴而諸生莫敢犯時武宗無嗣上疏請於宗藩中擇其親且賢者育於宮中代行溫清烝嘗之禮其爲翰長武宗狩宣大疏請回鑾曰六師不備遠違法駕內無近親之託外有事變之虞若鑾輿一日未返則臣子之心一日不能安其後百官相率諫南巡者罪且不測瑤上疏救之辭尤切直其在吏部承羣小竊柄

之餘政以賄成官以意授士習靡然日趨於壞屬考察京官諸凡清議有干者多見屏黜登賢汰冗不及究所施而遷去前後所上封事士林多傳錄其要語則勸 上清心省事法堯舜之恭已無爲用漢文之與民休息力行王道辨別忠邪賢才皆可用之人不必備求平易有近民之實不必苛擾治有端緒不必責効於旦夕之間事可包荒不必刻意於淵魚之察人謂其救時之藥石云其在內閣有所論列多觸忌諱 上優容之再求退不允有勲戚怙勢奪畿內民地萬餘頃詭言國初所賜歲久失之旣得 旨矣畿

民大恐瑤言於上曰百姓爲業且久一旦奪之恐
生變上爲停前命仍給之民性沉靜寡默居政府
不輕發言遇事所難徐出一二語輒中款節屢典文
衡以平正簡要取士力去浮誇險怪之說文體爲之
一變詩文冲澹沉著自成一家言博極羣書根於理
要世有非考亭之學者瑤曰彼何所見第好名耳力
詆之戊子以疾卒壽六十四謚文隱

王宸

王宸字具瞻其先河南郟縣人因從戎籍于真定弘
治庚戌進士授吏科給事中遼東守臣妄殺降夷冒

功次命宸往按之有以千金行賄者卒不能動竟置
於法尋選禮科都給事中正德初年番僧那卜堅道
士陳應循以左道出入禁掖宸請明正其罪言極剴
直朝論譴之正德中逆瑾擅權宸忤瑾矯旨繫獄幾
死瑾敗得釋遷光祿卿歷官應天府府尹政務寬大
屬邑孔姓欲冒先聖裔有言賂以萬金者叱之竟不
許乞歸四年卒賜祭葬宸始終清慎居官所在著聲
居家孝友尤礪名檢內外無間言焉

郭濬

郭濬平山人弘治庚戌進士歷吉水新城知縣砥勵

清操自俸祿外分毫不取屢遷戶部郎中經理糧儲
民頌公廉及轉兩淮運司同知釐革宿弊權貴歛迹
鹽法大振然雅志恬退以山東叅議致仕給半俸終
身

呂 鏜

呂鏜晉州人弘治庚戌進士尹武進縣卓有能聲縣
治至今祠祀之薦擢御史首劾逆瑾所昵亞卿四人
皆去瑾啣之遂諷銓部補山西叅議隨以他故矯旨
送錦衣獄杖而黜之由是隙家乘機以飛語誣鏜再
下錦衣衛獄坐杖殺之世廟初追贈右叅政天下

士論多惜焉

孔環

孔環南宮人正德中由歲貢知來安縣時逆瑾擅權環忤其黨竟爲所陷左遷河南西華教諭六年大盜起霸州奄至西華城陷被執賊持刃迫之曰若呼我大王卽舍汝去環厲聲罵曰賊狗奴我爲國家臣恨不斬汝萬段以報國肯呼汝逆賊爲王以求活耶遂被害時河南總制彭澤以死節聞奉 旨詔一子冠帶西華至今祠之

張璿

張璿字仲齊號恒山晉州人生而聰慧英發自爲兒時卽有犬志年十四入郡庠刻勵向學一時並遊者皆推讓之戶曹李君夢陽見其文遂大驚異弘治甲子鄉試第一正德戊辰舉進士己巳考御史第一再考實授復居第一臺卿屠公瀟每指所試獄詞曰是書生乃有老吏筆如此尋掌道事會邊帥馬澄乞討蟒衣上疏劾之風采動朝宁未幾巡茶陝西會逆瑾煽虐凡官秦地者必先納交其親識族屬璿一切拒之莫以私干者時將官曹雄結姻於瑾佩征西大將軍印其子入京過陝城撫按藩臬多趨承者獨不爲

禮雄子銜之肆毀於瑾使人伺察者三至卒無所得
辛未復巡按山東是時大盜劉六劉七刼掠諸省而
山東爲甚臺中被差者多假告而去璿則慨然請行
比至檄下諸郡縣城池練兵士嚴詰察爲守禦計巡
歷所及問民疾苦去吏貪殘復請蠲賦稅表忠烈東
人以得更生爲幸先是巡撫都御史張鳳任情虐下
疏劾之宰執有欲庇之者再疏其言動之非文移之
謬宰執雖甚怒璿而鳳竟罷去左轄姜洪廉正人也
不能諂事舊按遂劾其年邁昏妄璿力與白之朝論
爭傳其疏先是閩人谷大用督兵勦賊謾無成功璿

疏陳三事一曰罷征未果二曰冗兵太多三曰事權不一蓋指宦者爲地方害也 上嘉納之尋詔大用

回無何賊出東萊境上會僉事許君達牛君鸞及邊將劉暉許太輩會兵逆入璿爲分命把截指授方略賊始遁去遂劾各官怠緩縱弛者俱蒙罰治賊平撫鎮以奏捷會稿璿曰叅劾吾職也至于奏捷則諸公事吾或附名是借衆邀賞也遂不具奏識者以爲知大體後以公論有文綺白金之賜癸酉還京甲戌春值乾清宮災率同僚御史條陳八事還宮閭復司香早視朝御經筵掣邊軍去番僧革皇店謹濫功言極

剴切 上雖未納亦不之罪旣而復差南畿提學是
時學政寬弛富室宦家子弟濫名庠校者甚衆及就
試多曳白者於是嚴條約公勸懲革浮靡振篤實雖
勢豪無復假借人以爲嚴毅公明乙亥轉大理右寺
丞丙子丁母憂免喪轉左寺丞嘉靖壬午總制侍郎
臧公鳳疏薦大同巡撫不果旋轉右少卿贊佐大理
後先五年凡叅駁稍偏反復論辯必歸於是而後已
癸未轉右僉都御史巡撫寧夏首劾總兵大將之退
怯者軍將莫不凜然慶庶人台沈先倡寘鑄之變漏
網免誅流惡邊陲正德以來撫斯地者莫敢誰何璿

至赴訴者盈庭乃憤然剪其枝葉漸及根株庶人始有懼意又以謀復護衛奏下禮兵二部移文勘報璿據法以聞事遂寢庶人憾之陰結官犯謀爲中傷暮夜聞報罪人就擒璿以反狀奏上遣中官憲臣往勘庶人徧圖救援勘官利之動爲掩覆璿與總鎮因有提解之命未幾獲庶人納賄私單總鎮喜曰持此上聞助逆者當復何說璿曰奈何爲此敗滿朝縉紳乎遂引火焚之比至京賴上明聖得還原職及嬰變故後百念淡然遂上疏乞歸旣歸日侍兄太守公田園觴咏若將終身西夏士人感其遏亂之功爲

建生祠肖像祀兩京臺諫先後薦於朝有謂台沈之惡不減宸濠張璿之功不下王守仁而當國者受庶人私賂若罔聞知以致中外至今悼惜已丑詔求耆舊南北言官一時疏薦再起爲都察院提督操江至則振紀綱勤校閱嚴訪緝明賞罰官吏畏威一時凜肅先是上之建四郊也協諸御史上疏忤旨奪俸南禮部侍郎黃琯恃寵貪污爲御史張寅所劾黃卽奏辯且自陳議禮功並示其背刺盡忠報國四字冀動上心寅復劾其罔上並行都察院勘焉尚書某謂黃背實有字非罔也璿正色曰原其刺字之意

不過欲求美官耳今穢迹已著不能斥抑反欲誣正人乎尚書默然而璿亦得薄謫方相臣張孚敬觀政大理也建議大禮張以書示之璿謂廷尉鄭公岳曰張言未可誣也自是秉用遂感爲知己且欲顯用而璿漸拒遠之自後吏屢推巡撫理卿并河南道侍郎俱不果用張罷相李公時繼之時以文序送王太宰瓊歸中有大德大才大功之語璿乃笑而弗言李有愧色因構其鄉人徐給事劾以不能捕盜反箠撻軍官疏入李陰爲之地而罷璿歸矣璿子已成進士以工部郎過家乃率諸孫捧觴膝下璿及其兄太守君

懽甚且曰彼忌我者將以去官爲辱安知其樂如是耶於是釀酒栽花治田種圃日惟爲娛老之計戊戌詔復致仕而兩京部院臺諫多連疏薦之者方擬起用竟以疾卒享年六十又六所著有家藏集東巡錄撫寧錄若干卷

呂秉彝

呂秉彝字性之晉州人也幼卽哲靈有遠志嘗與羣兒戲郡守至儕輩皆驚避秉彝獨留止問朗然直對人已覘其不凡比爲郡庠生董督學得所試文輒以傳諭多士畿內士無弗以爲佳者然積試不第至正

德丁卯戊辰始連舉進士選爲御史辭弗就復選爲給事又辭弗就友人詰之對曰居諱言之朝處必危之地享其名而怠其職非仁趨於始而悔於終不智旣尹章丘適歲大饑而上官督租尤酷民多逋亡乃勸富人輸粟以賑貧窮民用少蘇是時誅求孔棘燕趙青兗盜騷然煩興所過郡邑十七屠破崇城浚隍練器撫士嚴賞必罰以作忠勇盜薄章丘輒遁去他日民有訟人以死罪於上官而訛於民者上官移縣捕未獲會有他訟詣庭者見其辭懇遽曰爾非誤人以死者耶其人驚服凡發姦多類此去章丘民攀轅

泣留未三載大水浸城不陷民又相謠曰昔非此城
吾其虜乎今非此城吾其魚乎仁人之利何其裕乎
於是醵錢立祠及去思碑旣抵京大宰知其循良卒
授御史甲戌三月以母喪歸初自章丘被徵過家遭
母疾日夜親湯藥旣瘳猶不忍離故久而後授職除
喪未幾又遭父憂痛楚結衷頰肉頓減遂成鰥瘁至
庚辰始獲實授時天下多虞武人用事宣大尤急而
巡按且缺竟以越例奏往旣至邊商同儕有被殺者
餘商法當誅故緩其獄尋果獲殺商者邊鄙以爲神
凡兩鎮遺姦積弊剗革殆盡歲雖饑饉罷瘵亦皆安

堵秋魑見於家有鵬雛於寢室遂病反胃不起兩鎮士咸哀悼焉距生四十有八耳秉彝貌偉行莊望之知爲端士且醇慤明坦人樂與之遊至其辨析物理該括羣書超邁衆見足聳人聽聞若乃持正不私寬厚不忤奉身儉約自爲諸生已然矣惜天奪之年不能究其所蘊蓄也

劉俊

劉俊字君佐深州人也舉進士初授青州府推官鞫獄詳允不避盤錯每行部不治裝亦不列騶從衣大布蕭然匹馬如書生雖強梗桀驁驚無敢不懼伏秋毫

無所容私吏庶凜凜大稱廉平尋召爲御史風裁益振擢河南按察司僉事遷副使所決獄多人所避難弗任者則陽推曰非劉公莫治俊亦蹇蹇自負聞事風生無少回屈有罪者度不可行私卽首服每分巡大梁河內等道一道肅清歲當代姦吏酌酒相慶是時進士多出補州縣上司禮之視他爲優其州縣亦自謂行當被召故往往爲急政立聲名或倨肆自如甚者苞苴公行不自重惜俊曰凡州縣皆吾屬也政均以品則可矣若分析太明則使賢者弛其志而不肖者傷於寵政蠹民敝恒必由之故御屬吏一視兼

聽惟以法爲準不少寬貸後有劉某者河南人也弗
悅俊遣爲飛語遂註名貪虐以奏詔下公卿議大司
徒侶公鍾識俊名曰是青州故廉吏劉俊邪聞其砥
節愈厲奈何有此事遂寢然性慙直不飾邊幅在官
終日閉門不通一謁有善客至時或對飲惟蔬菜湯
餅而已必求盡醉指大樽曰吾興在是非浹洽不可
獎善疾惡皆越常格率意而行不爲詭激後以致仕
卒于家

賈應春

賈應春字東陽號樵村世爲真定縣人正德己卯中

順天鄉舉嘉靖癸未登進士授河南南陽縣令縣當
南北孔道衝劇莫加又藩封在邦城中軍民雜揉豪
右玩法難治應春威惠互用境內肅清秩滿擢知和
州繼拜南京刑部員外郎擢本部郎中盡心讞斷明
威著聲尋改刑部郎中拜知山西潞安府踰年改開
封巳亥 世廟幸承天過汴當路者檄以綜理諸務
區畫詳審綱舉目張人服其敏無何擢陝西按察司
副使會河南巡按捃摭流議劾其勘報失實左遷山
東鹽運司同知俄遷知漢陽府丁未進陝中憲副尋
擢右叅政寧羗賊起地方騷撫按檄令視師應時

底定事聞 上嘉之有幣帛之賜已酉擢本省按察使庚戌擢布政使法紀風行保釐政舉辛亥拜右副都御史巡撫關中繕兵積儲攘外安內癸丑加兵部右侍郎兼右僉都御史總督三邊軍務時虜酋俺荅吉囊最強率其黨乘秋寇邊蹂踐禾稼雲龍應朔諸州亟罹其害時關陝亦有震隣之虞應春夙夜惕勵罄心殫謀防禦備至是年六月虜大舉入寇鄜延誓師率旅衝擊斬首二百餘級獲馬駝夷器甚多醜類大剽八月虜復入寇逆戰牛營繼戰于神木堡山丹斬首級無算甲寅正月有延綏之捷八月有濫泥溝

之捷復有紅井之捷 上厚賜銀幣嘉之尋擢本部
左侍郎仍兼院職總督宣大軍務未行奉 旨仍舊
總三邊乙卯虜番並犯甘肅繼犯延綏應春布旅迎
敵斬獲甚衆加右都御史兼兵部右侍郎仍舊總督
丁巳虜寇延綏斬首百餘級獲馬駝夷器不可勝數
應春在陝數年兵戎整飭自寧夏至武修築邊牆一
萬一千八百餘丈有白金之賜仍加俸一級是歲拜
南京戶部尚書尋改刑部尚書未幾改戶部尚書考
覈章程勾稽贏縮 國計賴焉戊午夏二品考績
上遣中官賜以寶鑑羊酒晉階資政大夫時應春以

疾上疏得 旨致政歸二親壽皆踰耄應春承懽膝
下愉愉如也居無何疾復作不起訃聞贈太子少保

王 誥

王誥字公遇號棠谿趙州臨城人誥體貌魁偉丰神
俊整性簡重寡言甫冠領正德己卯鄉薦後登嘉靖
癸未進士授行人奉命伊府祭葬力却餽贐尋擢司
副歷戶部員外郎郎中監收糧斛出納惟謹管內十
庫多所釐革中貴不敢干以私嘗請汰京師養濟冒
濫歲省米八萬餘石大司徒李公雅重之未幾乞歸
省丁父艱甲午服闋之京會大同兵變殺總兵官李

瑾人心洶洶太宰許公雅知其才遂擢是郡比至計擒首惡數十人悉抵之法餘無所問重鎮以安事聞

上錄其功廕子胤魯汝寧守禦所百戶世襲丁酉遭內艱郡民遮泣於道如失怙恃旣而家食者八年丙午起補東昌郡明年陞山東按察副使整飭密雲兵備庚戌晉叅陝藩在道轉僉都御史奉勅撫治甘肅鎮爲古張掖酒泉郡控引番夷艱於統馭至則增修堡寨預集兵糧防禦經畫悉中機宜先後斬虜首百三十餘級上賜金幣者再進秩副都御史乙卯遷南京戶侍督儲頃之遷右都總督漕運鎮撫淮南

時倭夷猖獗自通泰直犯淮泗諸路所過屠毒哭聲
震野屬誥至嚴兵固守遂疏請旗牌督率將士誓剪
此朝食會都指揮劉顯至分兵夾擊倭奴氣奪大破
之捷奏蒙賜白金文綺旣而議兵餉休客兵寬租稅
停馬匹數事皆長慮却顧先事爲備人服其見淮海
方倚爲重而病不起矣訃聞予祭葬如例享年六十
誥天性孝友倜儻有大計遇事敢爲不喜矜伐久歷
邊鎮威望赫然至今人想慕其風采所著有河西稿
淮南奏議西平縣志東隅集行於世

楊 宜

楊宜字伯時直隸衡水人嘉靖癸未進士任監察御史以風力著稱督學南畿藻鑑精確士一經其賞識無不得雋以去如瞿文懿陸宗伯諸公位卿寺登八座者數百人釐正文體敦崇行誼時以司馬文正公方之後總計留京開府兩浙所至聲績蔚然至今士子稱正直忠厚者必曰裁菴先生云

毛鵬

毛鵬字汝南號雙渠家世冀州棗強縣人生而穎異總丱補邑庠諸生試輒爲諸生冠嘉靖丙午丁未聯拔巍科筮仕江陰令廉明方正事如素練平徭薄稅

節冗賑乏摘奸宄以遂良闢書院以督課士民迄今
頌之邑濱江土城卑圯盜賊不戢比至撫良抑奸盜
皆望風喙遁於是增築城垣易以磚石財力殆數萬
計而民不告勞費壬子海倭抵城下恃以無恐奏最
召拜御史歷諸煩劇率著風裁癸丑出按宣大二鎮
酌時宜條邊務至百六十餘疏陳宗室饒陽王充焄
通夷稔惡承奉劉寶助虐憑陵並桀悍難制奏訊于
辟宗藩肅然乙卯按山東剔蠹起頽飭僚貞度父老
言數十年來所聞覩廉清而安靜者指不多屈訓士
崇古誼論文黜浮靡是秋監鄉試所取皆一時名士

號得人丁已閱京營汰老疲練什伍增軍糧戎務大振戊午冬掌河南道會計羣吏秉虛持平甄別明當莫敢干以私己未春監禮部會試檢防嚴密發士之懷挾者寘諸法夙弊頓息庚申奉命留都理積牘辛酉晉貳岡卿考牧政隨事靖共罔不底績壬戌陞寧夏巡撫初漢唐有二壩夏人引以溉田歲久堙塞至則親度疏濬水利復興稔無虛歲橫城馬頭隘口虜酋出沒舊無亭障乃築牆塹一萬八千五百餘丈以伐虜謀先是鎮城及河東諸營堡一經地震率多崩圯自鵬增葺守用無虞秋套虜窺山後入犯清水營

一帶及興武花馬池之役鵬前後指授方略俘獲甚多然不自尚其功盡以歸將卒人咸效死力且恤商販而人樂輸粟禁侵牟而軍得安業西夏咸倚之爲長城云甲子擢都察院右副都御史提督雁門等關巡撫山西盡瘁邊事遂遘危疾乞歸竟以不起時年四十有四已耳鵬體貌魁梧丰神爽朗賦性剛介持身端嚴博典籍工詩文孝友嫺睦之行素孚于里閭至其經濟醞藉尤爲時所推重方虛倚毘而竟爾齋志莫不傷之

王 命

王命字欽甫別號鶴程真定饒陽人嘉靖甲子舉于鄉累上公車不售除鳳翔令履任一主於節愛盡減諸供應不以煩民直指行部至僅具廩餼且自言邑居貧甚令不能加賦以飾厨傳令當罷去直指大駭旣而廉其治狀語諸守廵曰令古人也吾儕當共調護之俾行其志命以此益展意自信邑之驛騎每爲往來者所倍取或倍索其直折辱之命乃置籍于座右按牒而給竟無敢多索一馬者歲所省凡若干金郡邑歲時公宴舊皆倚辦里甲猾胥因而乾沒其中命省見年諸役悉令歸農而計費授直平市之民所

省復若干金公用器具一切出入司之者不敢問時
苦賠累命白于守自掌其籍計籍以出計籍以入終
歲不損一物所省復若干金凡一切站糧之新派丁
力之加派者悉從豁除矣兩造具命但判其曲直不
科贖鍰薪俸所入別貯之日詢民之耕不能具牛種
織不能具機杵貧不能婚嫁者逋官租久繫不能償
者咸以多寡周給之俾各安其生業邑有尼以妖淫
敗俗命爲逐之出境而詢問風俗表揚貞節禮敬士
夫作新學校以端導民之路邑之審編舊必浹月旣
竣而告者紛紜以爲常命裏糧躬歷諸郊隨民所聚

以次審之八日而畢民不費一錢無不懽然服其公
者郡東雍水所注每暴漲行旅阻絕命出橐中金辦
材鳩工旦暮往督之未兩月而石梁成大都命視民
如子視官事如家事靡利弗興靡害弗除薄於爲身
而勞于爲民苦於厚下而儉於奉上蓋三載如一日
關以西語循良者必舉命爲高等戊戌入計卽騎乘
皆自其家備之蕭然僕隸數人而已旣而竟罹察典
陝之藩臬士人皆錯愕從役爲之號泣或問其故命
曰吾不能善事上官負罪實多大人長者時或見原
獨恤刑使者移檄治衣費可五十餘金吾妄意使者

奉命恤民非以剝民也未有以應今牒具在疏言於
朝當與兩敗矣然寧人傷我吾無傷人吾實以拮据
病困緣是得歸幸矣命歸家未幾而以疾卒年六十
有六命家食時溲泥大溢水沒城城不浸者數板饒
民皇皇無以爲計有婦人呼於市曰必王春元祭之
時饒有兩王春元問主名指曰命也命聞殺牲爲文
登城望祭祭畢而水落迄不爲災或以問故婦曰渠
東斗星也翌日復問其婦懵然不復憶矣人咸異之
又治鳳時秋禾正茂忽有蟲如蠶而微小色正黑緣
苗食之徧四境皆然百姓奔告祈拯救命卽爲文率

衆禱於神詰朝而蟲跡如掃竟亦莫知所往鳳士民
爲圖頌之命常以治邑勞瘁成危病醫藥罔效夜夢
梓童神告之曰服補心丹乃愈覺以語醫醫言非對
症藥已之旣復夢如前卽和而服之遂愈豈非精能
感神者哉

宋登春

宋登春字應元趙郡新河人壯歲髮卽衰白因自號
海翁人業以海翁稱之晚居江陵之天鵝池更號鵝
池生宋先世嘗累高貲登春少失父母家乃貧落然
性嗜酒家貧不能長得酒則時發憤讀古人書見前

世結纓射書擊筑棄印諸賢豪急難奇節未嘗不慷慨悲歌泣數行下也始慕俠能挽韁馳騎間出其餘智爲小詩輒自喜不欲以示人又稍稍通繪事師江夏吳偉鄰之父有頎而鬚者生戲爲之貌絕肖父因勸習此可生業何乃日沈酣里中也傲然不應以是里中盡目爲狂生亡所知名年三十會一歲間妻子女五人俱相繼死仰天歎曰咄嗟天乎將驅我於埃壚之外乎遂屏家於其兄而自囊書遠遊遊至博陵博陵有故所善客憐之餼之塾舍二年默默不自得竟謝去去之京師日跨一蹇驢行長安道中往來覓

詩是時臨淄布衣某以詩遊公卿間聲稱籍甚生間得其詩唾之曰作詩何爲者而令七尺軀津津謏貴人丐活耶居京師月餘亡所遇又去之渤海入兗州登嶧山觀秦皇帝遺碑還居長白山一蕭寺出囊中故所貯漢魏盛唐名家詩閉關揣摩如是者三年頗窺作者之戶遂大放厥詞而於五言尤工眼駸駸白亡今人矣又去而浮淮海渡楊子江登北固山以望金陵鍾山紫氣過雲陽匍伏延陵季子祠下涉吳會訪錢塘天竺靈隱諸峰已復走徐青歸新河數日又云出居庸循太行而西窮關陝澤潞諸邊塞其在井

徑嘗居龍窩寺瓶粟罄矣寺僧厭苦之曰僧母窘我
我試繪一小圖持至市中當得粟已而果鬻粟五升
伺粟不盡不更繪而市人爭欲得其繪則日擔粟詣
寺門相賂乃避至城外一山樓樓依岨陡絕樵蘇所
不至山鬼晝出侮人生坐臥其中第繙華嚴經數卷
足不履戶外者累月山中人疑爲逋客將逐之而生
遂遊太原太原之逆旅人以生衣垢敝待之不爲禮
會旁舍賈欲覓詩爲其長者壽逆旅人以試生生卽
與之詩復問生能書乎又與之書逆旅人始恨知生
之晚也而賈更製鮮好衣數襲遺生生佯受之而轉

投其逆旅人逆旅人愈慚感生復自衣其垢敝者長
揖逆旅人去也已由棧道入西川遊峨眉山遡巴下
荆鄂將達於潯陽返於黃迂雲夢而北走大梁偶憇
釣州酒肆而釣州有党中丞者得其所題酒肆中絕
句詩強致之家留數月復自宛涉襄過京山所跨驢
蹶於唐氏之淖傾其囊中書曝之衢唐氏異生所爲
要與之飲食歡相得也遂主唐氏一歲而行唐氏爲
刻其詩傳荆郢間更贈以二童子命其名曰丹砂白
石挾二童子轉江陵登王粲樓讀其賦感昔賢流寓
地有終焉之志前嘗至江陵居城西開元觀故遼王

奇其詩召謁便殿語不合一夕遁去去數年復來生
老矣乃依其兄子宋鯨耕天鵝池之石田歲獲菽十
斛以其半易米雜菽炊日度一餐稍羨則盡以給酒
費晝夜哦詩不絕口是時吳人徐學謨爲荊州守聞
生高自往物色之生始匿不欲見至再始見明日戴
紫羅冠衣皂繒衫報謁据太守上座太守侍人竊竊
私語曰客顯妄亡知太守奈何輕威也久之往來廨
中而太守寮吏逢太守意皆浮慕生爲謬恭延致之
生揣其無實終不肯往太守爲生授室城中從天池
徙之居約以他日見訪是日太守偶先有所往經其

門而遲及之生恚曰是太守給我也比臨其室生已
鍵扉臥不欲內太守太守令人穴其垣入見生方科
跣席一藁僵偃壁下太守笑曰若欲爲龐萌耶瑯琊
人將捕汝矣生起謝曰室無几榻難淹尊官耳因索
酒飲之薄暮而罷其後數年太守坐廢家居生在江
陵念太守憔悴業欲從之遊而貧不能促裝乃詭爲
羽人裝手持一鉢裹敗衲行乞於途自江陵踰足數
千里來海上海上人以爲太守客遠來爭勞苦之而
日持河豚酒享生生一嚼而盡明日見持河豚酒者
不爲謝亦不知爲誰其後持河豚酒者遂不復至而

海上主帥郭公者亦以太守故遣人遺之金爲生壽
生揮之曰將軍以貧士爲金遊耶東海苦笑我矣幸
使者謝將軍時太守欲買田舍生于海上而廉其性
骯髒不能偕時俗人不復強也居三月別歸江陵生
歸太守囑之曰江陵難將作矣盍定計審處之生領
之而去其後二年遼王果坐不法廢比奏當成而遼
王之客亡得脫者生嘗爲遼王上客而又爲人倨卒
以狷介故不及于難後遊石首爲少年所窘辱發憤
去因童髮爲頭陀不知所之

補遺

冠義

冠義字宗昇直隸平山人永樂中知新野縣有能聲
宣德中陞知鄧州正直嚴明聽訟立剖誠僞吏民不
敢欺宿弊盡革賦役均平凡百廢墜一一脩舉暇則
詰學課勵生徒城中掘地嘗得一石云若要鄧州治
還須冠公至其政績果能繼萊公云

張宏

張宏字維裕真定縣人正德三年進士除雲南道御
史以劾劉瑾謫蘇州府推官陞青州府同知累陞都
御史巡撫延綏致仕

蔡 黻

蔡黻字天章寧晉縣人嘉靖八年進士由行人選浙
江道御史刷卷淮揚以劾吏部汪尚書鉉廷杖爲民
十八年起原官丁憂二十一年改河南道降山東按
察司知事隆慶元年復御史致仕